

唐
文
粹

一
三

藏
文
粹
PDG

重校正唐文粹卷第七十五

吳興姚

鉉

纂

記戊摠八首

興利二

宣州南陵縣大農陂記

韋瓘

鹽池記

梁肅

卜勝三

東山記

張說

司徒岐國公杜城郊居記

權德輿

君陽遯叟山居記

陸希聲

館舍一

廬州同食館記

陳鴻

橋梁一

汾河義橋記

崔祐甫

井一

義井記 孫真

宣州南陵縣大農陂記

韋瓘

宣部支邑十城而南陵處劇蓋由庶民翬豪物產多狀山川闢錯風俗詭浮故理束則民潰政放則民怠俱不得其極自非肅廉和敏措動守中則莫至良能況功利及物邪皇帝四年今地官侍郎盧公觀察宣部精心厚下重難邑長乃以寧國令順陽范君假南陵印爲大夫於是肅以檢姦廉以約身和以納民敏以應物物不夭落民得沐泰盧公嘗曰時或爽候雲龍遁逃膏澤翔枯物不遂液吾人其瘁乎下令邑中有能修復陂塘積水防患者終懋厥功先時縣有廢陂曰大農積歲不理荒梗幽扈丘隰遁形空規殘狀非鄉黨之壽耄不可疑識輿人飛語他邑病能訾訾訾波翻風合范君獨判於心不畏騰口曰利於人也使吾獲戾而罹悔真吾心也且黔愚皆苦於始作而泰於成功況吾君侯明吾天子聖尚

何懼哉乃召鄉老里正尹而計之具畚揭列綆鍤官礮礮堅披材
輦壤日必巡丈周察勢便仁以撫馴悅以附來法以督茲勤以勸
勞於是雲動雷斤斬莽闢蕪撥腐曝淤培高徹卑不知形疲不憚
苦骨不殘民力不費金刀潛軼化工事於農隙三旬而畢不戮一
人其始也驅江波六十里活活下來闢荒梗數萬畝汪汪虛明疊
石構嶺縱三百步龍蟠虎鬬橫殺衝波泄流引洫臂發三港支分
脉散澤入大田厥功既成乃風雨暴鬬洄復換晨飈飈沸會似聞
搆作及乎雨斬雲除則沙洲突出力捍嶺下若自開闢之初信爲
神物所相雖使江河合災驚濤懷山大浸崩驅暴猛來敵亦不能
軌峻防而侵厚趾斯乃天贊其功豈非仁深於物乎其或火雲藝
天旱魃爲虐歆蒸瘴怒蛟龍追誅而翠湫搖岸澄瀾洗月溶溶浩
浩獨落天光順勢導流猶潤百里則貫畦浮塍平歲之溉千頃豈
爲多哉其細也孕鱗甲之族育鳬鴈之羣羅生菰蒲萸合菱藻漁
父舟人浩歌揚楫厚生之物永永不極斯功也可以灼當世而芳

千古矣昔者西門豹治鄴召公治上蔡而史氏書美顯白良能以其因水茂功利澤及物者也則大農傑跡功符天作可以論古對能豈有愧乎范君尋遷御史後三年吏民益慕而願表尤功今連率范公以文行德器挺爲時賢爰領宣部仁義明舉其下聳善常推至公邑人三請於公乃曰他人有善惟恐不聞況伯氏功利如是吾豈詭故哉乃從之邑長李君久以材能弘張其化吏民甚安之追論大農盛績因民之心以成其善志亦春秋之事也鄉將石定錄事丁宗耆壽戴誠佐史章倫或叅其議或督其事洎百姓朱綸李縱田丘程胤等若干人咸請予爲記云

鹽池記

梁肅

黃河自崑崙山東會溟漲九折廻互鹽泉各一儒者書以爲海目則郇瑕氏之地瀆流其長觀乎北浴陵阜南瀕山麓湛湛煙碧浩無春冬蒸騰雲霓出入日月亦云廣矣雖吞喻垌隧代增渟鹵而利倍農穡有殷家邦貿惟從山湧不加海交兩都之軌達延萬賈

之資貨是人厭也當武后聖政務述省方鳴鑾載臨流潦旋敗
洎皇明道發澤漸殊垠天之既啓鹽乃旋復非夫蟠蚪神應坤次
靈孕亦曷能旌昏明籌負勝矣帝所宜念貴然來思分天牧以泣
擇藩佐而貳賢能鮮墜于事則胤字通閑扼拓礪之左隅鄰
大邑之東部崇府庫歲望平儲蓄樞管鍵夕俟乎閉藏茲乃慮終
於始也邦貴康食戒之克勤人非忘勞道在悅使大命日下巡功
歲移廣岸砥平而可礪脩畦綺分以如織是時也春光奪炎氣興
洪溝浚白波騰或溜或汨以汙以滿狀雲洩而雨駭或花明而雪
凝京坻蘊崇豆區嘉量隸戶徵筭鹽人揭書民無不供先薄稅以
從賦君孰與足逮黎庶而必分固非擅權利貴貨易土登陸而雷
輶流日驟水而雲臚擊星律有變給用無絕傳曰山澤林鹽國之
寶也茲其是焉若周物揆情易人推類施之求報大道之玄德也
明則啓祚聖人之知變也降人納汚明君之藏垢也羹餼調膳賢
人之入用也包四美而世濟資百工而國貞將以樹善永年非石

無以紀垂裕裔胄非文無以揚則我晉寶達于萬方也

東山記

張說

兵部尚書同中書門下三品修文館大學士韋公體含真靜思叶幽曠雖翊亮廊廟而緬懷林藪東山之曲有別業焉嵐氣入野榛煙出俗石潭竹岸松齋藥碗虹泉電射雲木虛吟惚恍疑夢間關忘術茲所謂丘壑夔龍衣冠巢許幸溫泉之歲也皇上聞而賞之廼命掌舍設帟金吾劃次太官載酒奉常抱樂停輿輦於青靄佇翬榆於紫氛百神朝于谷口千官飲乎池上緹騎環山朱旆焰野縱觀空巷途歌傳壑是日即席拜公逍遙公名其居曰清虛原幽棲谷景移樂極天子賦詩王后帝女官嬪邦媛歌焉和焉以寵德也加以中宮敦序謂我諸兄引內子於重幄見兒童於行殿家人之禮優棠棣之詩作於是實其筐筥下以昭忠信之獻貢其束帛上以示茲惠之恩朝野歡并君臣義洽夫飛翠華歷茨嶺至道之王也紆紫綬期赤松素履之輔也千載一時難乎此遇故兩曜合

舍衆星聚德雅道光華高風允塞寒谷煦景竅崖潤色荷歟盛事
振古未有篆之玄石貽代厥後

司徒岐國公杜城郊居記

權德輿

司徒岐國公以盛德相三朝以大中敷五教帝載叶龢太階齊平
旣致用於方內亦宅心於事外神京善地啓夏南出凡十有六里
而仁智之居在焉縈廻巖巘左右勝勢徑術逶迤於木杪臺亭巉
巖於山腹下崇岡冒青蒼步履平夷以至于堂皇四敞賓榻中容
宴豆孤齋開館幽槩隨之乃開洞穴以導泉脉其流泠泠或決或
渟激而杯行瀑爲玉聲初蒙於山下終匯於池際白波淪連繚以
方塘輕艦緩棹公洄上下見煙霞澄霽之狀魚鳥飛沈之適濯于
潺湲風干碧鮮紅葩火然素英雪翻芊緜葱蒨杳窅廻合含虛籟
以四達遡清輝而交映故其休沐燕息盍簪投轄則有鳴佩拖紳
宗工雋人金闥玉堂之賓淑姿脩態廻風遏雲之藝流光含睇中
飲笑抃交歡擊節不知公相之貴適其適故也易坤之說曰君子

以厚德載物詩曰愷悌君子求福不回惟公以德受福故光明昌
大每溫室宴見一人尊禮而不名故其代天工斷國論卓爾以冠
羣后暨天暇日之戾止於斯也則暢天理棲顥氣脩然以遺萬物
其無方歟其不器歟昔子房赤松之遊且非代教安石東山之賞
僻在下國豈若公密贊化育內諧恬曠如春之仁如樂之和以君
臣之交感兼動靜之極摯從古已還無公比焉公之華宗自漢建
平侯徙杜陵三守本封幾乎千祀故城南墟里多以杜爲名逮今
郊居不忘厥初又以見積厚流澤此焉回復且公之心無町畦壽
若岡陵昭融烜赫未始有極德輿謬陪衆君子升公之堂嘉招盛
集靡間弦晦以衆美之不可以不紀也承命遽書刻于巖石云

君陽遁叟山居記

陸希聲

遁叟以斯世方亂遺榮于朝築室陽羨之南而遁跡焉地當君山
之陽東谿之上古謂之湖洑渚遁叟旣以名自命又名其山曰頤
山谿曰蒙谿將以頤養蒙昧也在易頤之象䷚艮爲山山下有震

震爲雷爲龍頤山之下東走震澤震雷魚龍之所萃毓有頤象焉
蒙之象☶亦艮爲山山下有坎坎爲水爲險頤山之下泉流于險
而達于大谿有蒙象焉一旦遁叟觴谿山之神於庭酌而飲頤山
曰吾之所以命夫山之爲頤者勗子以養也子其養雲雨以潤物
養霧露以生物養風霆以長物養雪霜以肅物養巨材以充棟宇
養小材以爲蒸薪養茅管以爲茨籍養竹箭以爲器用養百果以
充口腹養百藥以蠲札瘥養昆蟲使咸樂其生養鳥獸使各遂其
性噫無或養妖雲悖雨以傷良稼養苦霧淫露以澤惡植養疾風
迅雷以摧槁朽養慘霜虐雪以殺根芟養擁腫之朴不爲榦材養
鈎棘之櫟不中樵爨養蔓延之藟以困條柯養蟠梗之根以固膏
土養弗食之實以蕃庶生養雜毒之藥以中函氣養蟬虺蜂蛭以
護巢窟養豺狼梟獍以害羣類維山有紳子其飲之無虧爾名而
窾爾實又酌而飲蒙谿曰吾所以命夫谿之爲蒙者勗子以決也
子其決於夷壤以發其源決於塞埴以通其流決於腴畝以施其

潤決於涸澤以溥其惠決於廣陂使介鱗蕃育決於巨浸使蚪龍
變化噫無或決於險阻以資其悍激決於林藪以縱其墊溺決於
鵽鹵以畜其施決於池籩以專其利決於圃實使鼃蟹爲菑決於
沮洳使鼃鼃得志維谿有神子其飲之無喪爾名而浮爾實於是
酌而自飲之吾之所以命是山也必將有所養也命是谿也亦將
有所決也吾將養吾志於道而不希於世養吾行於德而不眩於
俗養吾浩然之氣以合自然之英養吾誠明之意以入清明之願
又將決吾心於仁義使不違決吾志於中正使不過決吾身於天
命使不憂決吾跡於遁世使無悶如此而已遂與山谿揖讓竭吾
歡而罷弁且歌曰山乎谿乎吾之心乎醒乎醉乎吾與汝參乎

廬州同食館記

陳鴻

合肥郡城南門東上曰同食館梁柱朽蠹軒戶欹傾斷枿委階椽
落棟折風雨雪霜實不可宿太守陽平路君刺郡之明年冬十月
歲向熟民且閑陶瓦于原伐木于山磨舊礎築新墉迺豐實堂迺

義前軒怒楠蚪蚪層櫺牙牙中回洞深高簷騰掀階閒容揖讓楹
閒容賓盤柱閒容樂工屏閒容將吏左右爲寢室更衣之所朱戶
素壁潔而不華東西廂複廊直澍又西開下閣作饗舍廡屋宏大
中敞作南門容旌旗駟馬北上作丁字亭亭北列朱檻面城墉其
下淤溝開導通水因古岸植竹樹爲風月宴遊地東南自會稽朱
方宣城楊州西達蔡汝陸行抵京師江淮牧守三臺郎吏出入多
遊郡道是館成大賓小賓皆有次舍開元中江淮間人走嶠函台
肥壽春爲中路大曆末蔡人爲賊是道中廢元和中蔡州平二京
路復出于廬西江自白沙瓜步至于大梁斗門堰埭鹽鐵稅繒諸
侯權利駢指于河故衣冠商旅率皆直蔡會洛道路不第賓至授
館亦諸侯之事路君以家行文學知於朋友以端方沈默官御史
府以詳明典故爲尚書郎以通知政術爲合肥郡太守質平訖心
風俗丕變民知敬道吏不敢欺先時郡米數萬石輸揚州軸轡相
繼出巢湖入大江歲爲風波沈溺者半廼於湖東北岸橐臯里作

廩三十九間州東二邑人米輸於此由申港出新婦江至白沙人不勞水無害復他邑館舍次于同食無私利人人皆樂成昔左丘明傳經因事書事鴻因蔡州道及諸侯之稅因同食館及路君之政亦春秋之旨傳曰自廬已往賑廩同食大和三年太歲己酉正月壬午朔二十日辛丑記

汾河義橋記

崔祐甫

絳人有成橋于稷山縣南汾河水入境稱曰孝子詢之三十喪父母五十由鑲麻故其鄉黨捨氏不名貴之也初茲縣有具舟之役鄰邑有官修之梁自太原西河上黨平陽至于絳達于雍縣卒迫程賈人射利濟舟爲捷渡口如肆孝子川上喟然歎曰夫來者如斯其可勝記欲速不達式在茲乎見義不爲非勇也臨難不濟非義也迺願棄家乞諸他郡枯槁籃縷日恒歲積自阿闢而東陶唐儉風食貨艱難閭里褊小率令遠驟馳邇饋餉者臺喻美於編戶丁男捨耒而攻木義聲感也汾流湯湯河許牽射潰沙徙岸呀

呬轉騰奮築於激射之旁根柱於沸渭之下是慮是圖功就其十八九矣其年秋七月天作淫雨湍悍襄陵噫大水不仁前功蕩矣邑老鄉人涕泗弔之曰力竭於子天不恤是而已矣顧而不應且有後圖徵詩人之嘉謀參作者之遠慮曳索辦蔑繫舟戾航白露下而謀始止於凌澌杜春冰解而興功止於水潦降一嘆不可奪志三年其有成功廣可方軌平可轉轂去其飾成無丹腹取其固勢異虹蜺僉義於孝子之功也故曰義橋昔周王以懿戚封建吳札美盛德遺人西臨孟津北對姑射山河風土其肯徒然所以義表顯門功烈鄰境難其一善矧乃兼之由是縣人志之于石

義井記

邵真

義以發衷形外昭施物也井以下汲上導彰濟人也河間公鑿井於城垣之次陽門通莊之右偏署曰義正哉導之深源經之善利庇彼邃宇達于交衢鐵其瓶以永不羸石其甃以給無泥飛輪周散泄實前注平而平之隨用不私主發生以流潤當赫曦以伏炎

在搖落而激清抵凝洄而不閉環四序以其惠俾憧憧者知飲濯
所向焉義燠暘之虞濟煩乏之艱昏懣者得以濤盪瘳痼者由之
蠲愈滌汰氛全沃洒蒸灼淡然下攻與地配久化囂闇爲閑敞鄰
梵宮之清淨修廊對開連樓鬱峙嘯貞侶以宴息速嘉客以盟漱
指心而授應日而就彼豐福吉祿繁祉崇慶欲不萃於河間之門
得乎故比寺司刑上卿也西臺專席中丞也戎府佐政司馬也衆
貳外間顯榮當朝騫騫青冥前視萬里鑿井爲濟川之漸斲輪爲
乘軸之兆可轉盼而待矣公才蔚量碩質貞氣淳名膺王府心拂
塵累料物以經遠恤人以遂誠迴俸節財藏事彰義將獻祉于大
君貢休于元戎歸壽于高堂三事體大公之弘誓乃戒司翰者書
實刊記揭于井外大曆六年三月記

重校正唐文粹卷第七十六

吳興姚

鉉

纂

記已摠一十首

浮圖九

撫州寶應寺律藏院戒壇記顏真卿

孤山永福寺石壁法華經記元稹

福州南澗寺上方石像記歐陽詹

畫西方懺記白居易

黃石巖禪院記劉軻

沃州山禪院記白居易

塑像記段成式

信州南巖草衣禪師宴坐記權德輿

鸚鵡舍利塔記韋臯

災沴一

泗州大水記

呂周任

撫州寶應寺律藏院戒壇記

顏真卿

如來以身口意三業難調伏也淨尸羅以息其內行住坐卧四威儀攝善心也明布薩以昭其外故曰波羅提木叉是汝之師則憍陳如之善來迦葉波之尚法諸聲聞三歸約衆十四年以八敬度尼羯磨相承其致一也至漢靈帝建寧元年前有北天竺五桑門支法領等始於長安譯出四分戒本兼羯磨與大僧受戒至曹魏有天竺十尼自遠而來爲尼受具後秦姚萇弘始十一年有梵僧佛陀邪舍譯出四分律本而關內先行僧祇江南盛行十誦至元魏法聰律師始闡四分之宗聰傳道覆覆傳惠光光傳雲暉願願傳理隱樂洪雲雲傳遵遵傳智首首傳道宣宣傳洪法勵滿意意傳法成成傳大亮道實實岸超惠登登傳惠欽皆口相授受臻于壹奧欽俗姓徐洪州建昌人蓋漢孺子之後也二十二尋師于臨川楮山後五歲削髮糝于高安龍岡寺遂受戒有唐義淨則譯